

四庫全書

集部

欽定四庫全書

集部
文敏集卷一

詳校官編修臣裴謙

中書臣劉源溥覆勘

總校官中書臣朱鈐

校對官學正臣常循

謄錄監生臣劉廷勲

欽定四庫全書

集部六

楊文敏集

別集類五 明

提要

臣等謹案楊文敏集二十五卷明楊榮撰榮有後北征記已著錄榮當明全盛之日歷事四朝恩禮始終無間儒生遭遇可謂至榮故發為文章具有富貴福澤之氣應制諸作渢渢雅音其他詩文亦皆雍容平易肖其為人

雖無深湛幽渺之思縱橫馳驟之才足以震
耀一世而逶迤有度醇實無疵臺閣之文所
由與山林枯槁者異也與楊士奇同主一代
之文柄亦有由矣柄國既久晚進者遞相摹
擬城中高髻四方一尺餘波所衍漸流為膚
廓冗長千篇一律物窮則變於是何李崛起
倡為復古之論而士奇榮等遂為藝林之口
實平心而論凡文章之力足以轉移一世者

其始也必能自成一家其久也亦無不生弊
微獨東里一派即前後七子亦孰不皆然不
可以前人之盛併回護後來之衰亦不可以
後來之衰併掩沒前人之盛也亦何容以末
流放失遽病士奇與榮哉乾隆四十三年五
月恭校上

總纂官臣紀昀臣陸錫熊臣孫士毅

總校官臣陸費墀

文敏集原序

國朝既定海宇萬邦協和地平天成陰陽順序純厚清
淑之氣鍾美而為人於是英偉豪傑之士相繼而出既
以其學贊經綸興事功而致雍熙之治矣復發為文章
敷闡洪猷藻飾治具以鳴太平之盛自洪武至永樂蓋
文明極盛之時也若建安楊公者其可多得哉直在鄉
校時聞公領鄉薦第一名譽赫然思欲識公未能也太
宗皇帝即位之明年直亦取進士選入翰林俾盡讀中

祕書學古為文詞而公已在內閣典辭命職論思所與
共事者六七公皆天下之望又後二年直再被選拔得
從諸公後諸公不以直為愚而皆尊教焉聽其所言觀
其所存信一代之偉人也而公復以達政務善應變最
為上所親任凡制馭遠方飭師旅撫順討逆慮邊將有
不能辦者必命公往圖之公決機發策皆適其宜上躬
御六師清沙漠必命公從行所以贊襄裨益為多其在
朝廷朝夕侍左右圖議政事以安利兆民而人蓋陰受

其賜間為文章歌頌聖德施之詔誥典冊以申命行事
與凡官署民居所以施政教適性情而欲紀載其實序
述其故孝子慈孫欲銘著其祖考之美以垂諸不朽者
多請求於公公皆有以應其求其學博其理明其才贍
其氣充是以其言汪洋弘肆變化開闔而自合乎矩度
之正蓋渢渢乎盛傳於天下得之者不啻若南金拱璧
寶而藏之而今不可復得矣直在翰林三十七年辱與
處者蓋多惟公相好為最深蓋自永樂以來親見上之

所以教養拔擢而知其意欲有所用也故既處之要地使習知其故至於四朝實錄與夫大典禮大述作直皆與其間及直之去翰林惟公深惜之而反為忌者所病夫士之進退出處有命焉非人力所能勝奚以病為哉公之卒也直既為傳載其行事之大者以備他日太史之采擇至是子恭類次遺文若干篇將鋟梓以傳又屬直為之序於戲公之文豈待序而傳哉獨感公之知有不能已於言者故序諸其首簡公賜名榮字勉仁歷官

至少師工部尚書謹身殿大學士贈太師謚文敏云正
統十一年冬十二月望日資政大夫吏部尚書兼經筵
官前國史總裁泰和王直序

天啟一代文明之治必生奇偉不世出之才以匡輔之
故其事功足以經國而庇民其文章足以垂世而傳後
夫豈偶然之故哉三代邈矣漢唐宋以來號稱極盛其
間並美兼該亦不數人信乎才之難也吾觀贈光祿大
夫左柱國太師謚文敏楊公詩文集有以見公之不可

及馬公建安人少穎悟絕倫自遊校庠已有經綸天下之志暨登高科入翰林遭遇太宗皇帝委以心腹之寄居則參掌機密出則謀謨帷幄寵眷優厚羣臣鮮儼逮事仁宗宣宗今上皇帝付托愈隆爵位益尊聲望彌著縉紳士夫瞻仰其休光四夷八蠻想聞其風采豐功偉烈鏗鐫炳耀天下誦之猗歟盛哉復以其宏博之學敏瞻之才發為文章與古之作者頡頏後先高文大冊施諸朝廷雄詞直筆著於國史嘉猷讜論達於經筵凡文

武大臣勲績之所紀述中外名流先德之所表揚以及
海內縫掖之士欲有所借譽者得片言隻字莫不以為
至幸公亦隨其人之所求樂然應之不倦皆各適其意
以往何其富哉公沒之後其子尚寶司丞恭集公平生
所作以類分之托叙校正且屬序其後叙辱受教於公
甚深屢蒙薦拔雖不果登用居嘗自誦以為知己尚敢
以蕪陋辭乎於乎斯集之傳豈徒見公著述之盛而天
祐國家生才佐理之盛亦足徵焉叙何幸廁名簡末附

諸永久哉南京翰林侍講學士奉訓大夫前兼經筵官
吉水周叙書

自古國家以得賢材而興國朝太祖受命肇造區宇太
宗嗣服茂隆化理天下之材應期而出以備任使者布
滿于朝有能傑出其間學足以達治體材足以任國政
文足以代王言居輔翼之任受腹心之寄無媿於古之
所謂大臣者建安楊文敏公其人焉公少有大志刻苦
務學博洽經史於治亂興衰之由是非得失之理莫不

究盡慨然以功名自期許始由進士入官翰林太宗正
位簡文學之臣凡七人入祕閣掌密務公在選列姿度
英爽每侍閒燕有所顧問敷對剴切上奇其材可大用
於凡政之得失民之休戚悉以問之公即小心一志知
無不言言無不盡皆見聽納其言之行而功利及於民
者不可勝計然多公所獨知它人有不得而與知者上
益察知其忠日見親任邊情軍務一皆諳練嘗西鄙有
敵敵中情偽不可測遣同大將籌之既至洞識事機措

置得宜邊境帖息回奏大見獎賚上每親征公皆在行
從容帷幄贊畫居多繼事三朝忠勤始終如一日所以
被寵待之者羣臣莫能及至為文章見於詔誥命令訓
飭臣工謚戒軍旅撫諭四夷播告萬姓莫不嚴正詳雅
曲當人心出其緒餘作為碑銘誌記序述贊頌以應中
外人士之求又皆富瞻溫純動中矩度詩亦備極諸體
清遠俊麗趣味不凡稿總若干卷藏于家公子尚寶司
丞恭屬為之序夫士大夫抱材器力問學達則施諸事

業窮則見於文詞傳之當時垂之後世以托不朽公以
宏材碩學遭值盛世歷事列聖致位顯要獻納左右謀
聽計從以身任國家之重者垂四十年忠被人主之知
澤為生民之福聞望之隆勲業之著書諸史冊自足以
垂於不朽果何待文而後顯哉詩之與文復皆用之朝
廷布之方國天下賢士大夫莫不稱誦而追慕之又豈
待序而後傳哉但習禮無所肖似得從公出入於禁近
者有年于茲辱見知遇今不可復作矣良深永慨故敢

忘其膚陋序諸篇端云嘉議大夫禮部右侍郎吉水錢
習禮書

欽定四庫全書

文敏集卷一

明 楊榮 撰

應制

瑞應駟虞詩

有序

欽惟皇上蒞阼以來天清地寧五行順序仁覆四海澤
洞幽冥曩者永樂二年秋駟虞見於河南之鈞州白質
黑章虎軀猊首尾長於身性則仁厚不食生物不踐生
芻豢旼穆穆姿態異常臣下得之以進于朝羣臣萬姓

金史卷八十一
卷一
歡呼踴躍上表稱頌以為希世之瑞今茲永樂十一年
大駕巡狩北京而騶虞復見於青兗之間司獸者以獻
皇上命置闕門之外臣庶聚觀莫不歡欣抃躍咸謂皇
上至誠之德洞達無間乃克臻茲臣榮謹按瑞應圖云
騶虞義獸也帝王德至鳥獸澤洞幽冥則見然斯獸之
瑞皆徒傳聞於載籍豈若今之親覩而屢見哉此蓋皇
上好生之德通乎天地霈乎生靈故茲仁瑞之出以表
天地之至和以彰皇上之至仁以兆聖子神孫億萬年

太平之慶臣榮叨職詞林不可無詩歌以紀盛美謹拜
手稽首而獻詩曰

於維聖皇德被八垠神武不殺恢乎至仁恩信誕敷膏澤
旁及九族雍睦萬邦寧輯蠻貊戎夷罔不來庭飛潛動植
以遂以生治化重熙海宇同春雨暘時若禎祥駢臻黃犀
白象集于靈囿馴雉祥麟見于郊藪景星慶雲煜煜氤氲
甘露醴泉如酎如錫嘉禾瑞麥凡凡其茂赤草靈芝煜煜
其秀黃河載清海不揚波靈龜表孝神人協和天地自位

萬物並育瑞應之來以迓景福癸巳之歲仲夏初吉坤祇
效靈騶虞再出維此曹邑瑤光降靈義獸在野草木光榮
匪兕匪虎匪熊匪羆白質黑章猊首虎軀尾長於身是曰
騶虞其內仁厚其外舒舒不食生物不踐生芻神馳靈邁
一日千里周旋中規其儀可喜驅之不前撫之不驚虞人
致之進獻神京士庶駿奔歡聲沸騰僉曰噫嘻徒聞往古
今乃得之瑞物斯覩於維聖皇乃文乃武維武不用諸福
畢聚吁嗟騶虞實為上瑞昭我皇仁以彰信義庀義立極

龍圖是呈堯舜繼作鳳凰和鳴夏符洛龜殷降玄鳥赤
雀興周八百斯兆維茲仁獸應時而來皇繼往聖澤洞
九垓孰云漢唐文禽青兕赤駉白象昌足倫儼維皇聖
神異物不寶所寶維賢豐年是禱端拱無為以成至治
瑞應斯蕃匪約而至皇不自聖皇仁如天光昭鴻業傳
序萬年臣愧謏聞忻逢盛美作為詩歌以繼麟趾

甘露詩

有序

皇上紹承天位統臨萬方德化洋溢庶績咸熙雨暘順

序九有寧謐無有遠邇熙然泰和由是嘉祥疊臻諸福
畢至皇上方勵精圖治夙夜孳孳敬戒不怠數命皇太
孫率衛士演武于近郊以示安不忘危之意將以福生
民奠宗社建億萬年太平之業乃永樂十年十月甲子
甘露降于方山皇上復獵于武崗山之陽獲獸彌多宴
饗從官如前儀臣竊惟古者天子歲三田蓋以奉郊廟
御賓客充庖厨也故春蒐夏苗秋獮冬狩各以其時名
雖不同而所以為田除害之義則一以是而觀誠非娛

耳目心志之樂誇畋游甲兵之盛實所以順天道協人心乃車駕所次天休震動嘉祥滋至斯乃聖德格天感應之機捷於影響是豈偶然而已哉臣聞鶡冠子曰聖人之德上及太清下及太寧中及萬靈則甘露降今茲甘露之祥駢臻疊見是皆皇上至仁之德涵煦宇內聖子神孫重熙累洽以開太平之鴻業以流慶澤於悠久何其盛哉臣榮叨列侍從躬逢盛美歡抃不勝不可無歌詩以示後世謹拜手稽首而獻詩曰

聖皇車駕出九重狩獵屢駐鍾山東龍旗黃幄照晴空羽
林猛士氣如虹經丘越壑上龍輿是時霜清十月中木葉
脫落鳴天風黃金羈絡玉花驄萬騎雜遝紛紜從錦袍羽
箭控琯弓戈甲照日晴光融豪鷹健鶻筋骨雄勁翮直上
摩蒼穹斲斨殪兕射麋熊妖狐狡兔無遺蹤駕鵝鵝鵝勢
蹙窮墮羽洒血相橫縱懽呼得雋意氣濃乃知聖主致治
隆不以既治忘武功因時順動習兵戎為苗驅害慰三
農四郊自此樂年豐上天降祥福聖躬瀼瀼甘露凝栢

松飴甘肪白醴酪醲珠璣駢聯綴芳蕝粢粢不受杲日
烘靈氛煜煜氣沖融呈祥現瑞何所鍾衮衣垂拱蓬萊
宮梯航玉帛俱來同小臣叨祿愧才庸但願萬歲歌時
雍

瑞應麒麟詩

有序

欽惟聖天子以不世出之資膺受天命主宰神人即位
以來華夷效順海宇寧謐五緯不愆雨暘時若由是民
安物阜和氣充溢毓為禎祥先後十餘年間駢臻沓至

雖古昔傳聞所未見者今皆畢集茲非神化周浹聖德
感通曷克臻是乃永樂十二年秋榜葛剌國以麒麟來
獻踰年麻林國復來獻今年秋阿丹國又來獻吁何其
盛哉且四靈以麒麟為首王者至仁則出又云中國有
聖人在位則至蓋非世之所恒有者今數歲之中凡三
至焉豈無所自而然哉實由聖天子至仁大德上合天
心下被四海故川嶽效靈百神協應之所致誠國家萬
萬年太平悠久之徵不惟天下臣民仰賴無窮之福抑

亦聖子神孫萬萬世無窮之慶也臣榮忝職文翰屢覩
嘉禎每遇祥瑞之來必有詠歌以播揚盛美况此上瑞
所應非常奚可無述作以傳之於後世乎故不揣蕪陋
謹為詩一篇以獻其辭曰

於維聖皇受命自天仁及庶類恩周八埏禮義興行無有
遠邇日照月臨化成俗美九夷八蠻悉妄悉臣罔敢踰越
聿來獻珍鯨波洋洋望之無際島夷所居動數萬里玉音
所至莫不尊親淪肌浹髓被于皇仁僉曰陋邦服此聲教

海波晏然聖德之效乃梯乃航惟恐或後乃奉麒麟歸于
靈囿惟茲麒麟玄枵毓精非時不出非世不生其產應期
祥光上燭五彩繽紛卿雲煜煜天無沴氣地息妖氛山川
草木發秀楊芬既育既長益奇益異萬靈撫訶百神擁衛
魁然其質昂然其形龍顙鳳臆肉角膚身牛尾馬蹄折旋
規矩生物不傷音協律呂爰用入貢涉歷海洋秘恠屏迹
蛟鱷遁藏龜龍導從鸞鳳羽翼載馳載驅遂達京國進之
彤墀得覲天顏重瞳屢顧百僚聳觀嵩呼雷動再拜稽

首吾皇聖神永膺萬壽皇帝曰吁瑞不在茲惟慎厥德
乃為禎符爾公爾卿百僚士庶恪脩厥職勿滋逸豫三
光昭宣五緯弗虧品物咸亨惟瑞在茲仰惟聖皇體道
謙虛奇瑞屢臻抑而弗居戒慎滿盈奉天法祖度越百
王卓冠千古洛龜呈夏玄鳥降殷赤雀興周式昭前聞
維茲麒麟實天所授聖德格天永承天祐於維聖德廣
大難名巍巍蕩蕩堯舜莫京恩霈八紘澤覃四裔如雲
之行如雨之施天錫多福集于聖躬惟皇萬壽百祿是

崇雨順風調民安國泰海晏河清萬世永賴臣拜稽首
寶祚繇繇聖子神孫傳序萬年

神龜詩

有序

欽惟皇上虔恭仁孝一德格天自御宇以來深思太祖
聖神文武欽明啟運俊德成功統天大孝高皇帝功德
兼隆而孝陵之碑未建無以垂示將來乃命儒臣紀其
事實之詳繼命工伐石得于幕府山之陽其材孔良爰
求厥趺于龍潭山之麓發土得石龜長尺許廣半之文

玄蒼不假雕琢宛然若生衆工咸喜又下得貞石長衮
適稱為趺董工者以龜來獻勅置于奉天門命公卿百
僚咸觀之莫不稽首贊歎以為皇上至仁至孝感通于
上下神祇故皇天后土用是以表著焉翌日羣臣奉表
稱賀皇上率百僚躬獻孝陵以彰顯太祖神功聖德萬
世無窮之休臣以菲材叨侍禁近幸逢盛事不勝欣躍
謹拜手稽首為詩以獻

於昭皇祖聖神文武德合乾剛功超前古肇基江左虎踞

龍螭鴻圖鞏固宗社奠安際天極地罔不臣服朝貢以時
獻琛執玉卉裳椎髻接踵梯航南金大貝厥篚相望猗歟
我皇紹繼大統一遵成憲天錫智勇念彤羹牆永言孝思
陵廟奕奕未樹宮碑聖德神功紀于史氏載勒貞珉以詔
後世貞石既獲厥趺是求爰啟爰斲龍潭之丘有昂者龜
若瞻若顧忽焉以呈神物斯護其傍璀璨果得巨石相趺
是宜弗爽毫尺惟皇孝誠孚于神明有感斯應神祇效靈
濯以溫泉瑩如紫玉陳之丹陛韞之寶牘窪然其分間錯

以文匪雕匪琢氣凝網緼臣庶聚觀宛然天成歡呼踴躍
幸覩嘉禎帝曰嘻哉匪予之力神瑞之應皇考之德載蠲
吉日獻于孝陵陳之闕宮紀之金滕昔聞神龜負書出洛
夏后取則洪範是作今逢聖明文命誕敷獲此奇瑞異
世同符頌聲洋溢洽乎四海福祚綿綿億千萬載

瑞應麒麟詩

有序

祥麟昭聖德也麟為四靈之首希世之祥必有聖人在
位則應時而見仰惟皇上以聰明睿智之資具聖神文

武之德深仁厚澤覆育天下是以和氣薰蒸而靈物斯至茲實國家萬萬年太平之徵也臣榮生際盛時躬覩上瑞宜有詠歌以揚聖化謹拜手稽首而獻詩曰

猗歟祥麟其祥曷徵維皇繼統萬邦咸寧誕敷德澤丕昭文明至和旁達海嶽效靈曰惟盛時兆此嘉禎

維麟昭昭四靈之首精孕玄枵世不恆有義軒以降成康其後爰暨我皇斯乃云覲何以致之聖德之厚

麟之為麟具此衆體有膚其身有牛其尾旣龍其顙亦

馬其趾彼獸之凡莫之與比春秋所書周詩攸美

維麟之德厥具匪常懷仁之慈抱義之剛步中規圓亦
協矩方生物不食生草弗傷有暢厥音協宮諧商

維麟之生于彼海島和氣所鍾逢世熙皞莫高匪天弗
愛其道莫厚匪地弗愛其實式昭皇仁如天覆幬

維麟之來獻于丹陛百辟交歡同覩上瑞咸曰茲麟聖
德所致天毓禎祥以降至治聖壽齊天寶祚萬世

右祥麟六章章十句

白雉

憶昔成周時德化何昭彰萬國悉賓貢白雉來越裳至
今千載下簡冊尚流芳我朝際昌運至治躋虞唐列聖
啟鴻業恩澤覃八荒我皇御寶厯繼統握乾綱于時民
物豐和氣為禎祥白雉出西陲奇異非尋常迨迨數千
里持以獻明堂肌膚瑩凝雪毛羽淨涵霜皓鶴忽避彩
素鵬亦輟光稟茲金氣純上應聖德昌百辟皆欣抃拜
舞邁鴈行微臣忝朝列詠歌遂成章願效封人祝聖壽

同天長

玄兔

聖皇撫寰宇盛德致雍熙雨暘既時若民物遂蕃滋陰
陽孕至和充塞溢兩儀西夏產靈兔黝然呈瑞姿守臣
重驚異此兔何珍奇豈非我聖皇盛德斯致之載以雕
綺籠獻之白玉墀宛若負蒼璧有如錫玄圭晃晃碧瞳
開穆穆黑雲垂初疑育玄圃又想嚙墨池乃知造化神
生此誠所宜大哉天德純感召良在茲置之靈囿間麟

鳳相追隨天階同率舞實若唐虞時願言著青史萬載
流光輝

神應泉詩

有序

欽惟皇上御極以來海宇寧謐祥瑞屢臻華夏蠻夷罔
不率俾四海內外皞皞熙熙薰然泰和惟朔漠遺裔倔
強梗化拘戮信使寇攘邊場皇上赫怒躬率六師往征
之三月丙子駐師于凌霄峰厥地高燥泉水歉乏是夜
忽天雨雪彌布于地士馬充足莫不歡騰鼓舞以為皇

上至誠格天之所致也遂踰錦水磧歷壓虜川陟金剛阜
所經之處平沙曠漠鹹水悉化為甘泉丙申駐蹕于清水
源地鹹水涸忽涌泉上出滔滔汨汨瑩澈清潔斯須滂洋
將士環覩驚駭嗟異咸以為除滅殘寇之徵也皇上召中
官汲取嘗之味甚甘美仍賜將士皆飲乃命之曰神應泉
臣以菲才承恩扈從日近天顏親覩靈異莫效涓埃之報
願為歌詩以頌功德於無窮謹拜手稽首以獻其詞曰
猗歟我聖皇統承太祖業巍巍唐虞聖赫赫湯武烈六

合皆同風蠻貊罔不從筐篚日相望熙皞樂時雍蠢茲
蕞殘裔悖逆何昏囂拘戮我信使毒痛我邊氓天皇忽
震怒六師遂親征桓桓熊虎士燁燁若雷霆戈矛相照
耀旌幟何鮮明神謨展雄畧廟算由天成龍旗出居庸
雄師抵萬全綿延錦水磧雜還清水源跋涉極沙漠
苦地乏泉皇天彰聖德瑞雪何翩翩山川爭效靈甘泉
涌平川味若醴錫甘清比冰壺鮮滔滔流不窮斯湏即
成淵將士皆懽躍汲負相後先龍顏為之喜命茲神應

泉僉言協休徵渠魁當就孥微臣忝扈從載筆隨天營
鞠躬覩靈異賜飲沾恩榮行看清朔漠一掃欃槍蹤神
功昭萬世炳煥垂無窮

元夕賜觀燈

聖皇撫昌運肇基營北京駿奔來萬方小大罔不承上
天錫靈貺異瑞繽紛呈維時屆上元樂與臣庶并巨黿
戴神山裁窠出滄溟屹然向雙闕飛翠相迴縈瑞氣發
華彩五色含精英凝輝燭霄漢吐耀亘天庭羣仙駕鸞

鶴縹緲凌紫清簫韶合舜樂九奏鏘和鳴龍旂拂層霄
鳳輦敞雲屏星毬百寶麗火樹千花明魚龍陳雜戲羅
綺疊晶熒華夷總歡慶宴樂沾恩榮聖情重悅懌朝野
騰歌聲微臣忝侍從何以輸忠誠願言頌帝德萬歲樂
昇平

白鳥

慈烏復慈烏姿態何瑰奇由來能反哺厥性仁且慈既
育亦既長飛息相追隨靈異匪凡匹鳴止適所宜況此

鍾素質皎潔純不縑霜毛正璀璨雪羽何陸離馴狎出
天性迴翔動光儀昨日產京兆呈祥應明時今復來南
交致身白玉墀振翮發華彩瑤臺皓同輝瑞物不易致
嘉禎協昌期聖皇有至德大孝感穹祇宗廟既昭格於
焉錫蕃禧經始方在茲都邑煥巍巍竒祥日駢集寶祚
繇鴻基百辟總歡抃恩波洽華夷治化超前古端拱自
無為願同鵲巢什萬世歌雍熙

靈犀

聖皇臨大寶萬國悉來庭奇獸方交獻文犀忽遠呈肉
駿何磊砢獨角更崢嶸挺特應無比安馴自不驚辟寒
知有異照水詫通靈長向軒墀立寧隨耒耜耕騶虞堪
共處玄豹許肩行盛世多靈瑞長歌頌太平

白鸚鵡

上林風日美佳氣鬱葱葱花木競妍媚珍禽亦云充有
鳥曰鸚鵡態度莫與同質稟金精秀性含火德豐聰慧
復能言清音徹九重翠色變為素造化施神功霜毛既

皎潔雪羽何璁瓏
翱翔青瑣闥出入蓬萊宮
繫以紅錦條盛以黃金籠
常時沐恩寵眷顧回重瞳
素鵬不可並白鷺焉敢從
飲啄既得所飛止何雍容
適逢太平日昌運方興隆
願言在靈囿祝壽頻呼嵩

嘉禾

聖皇御寶歷萬國際昇平
海宇既寧謐民物自生成
和氣遂充溢奇祥日來呈
史冊莫殫述歌頌揚歡聲
及茲關陝間百穀歲屢登
嘉禾忽獻瑞數穗同一莖
金穉既

璀璨玉粒何晶瑩盈筐進丹陛芳氣藹天庭百辟盡瞻
覩聖心乃弗矜顧此兆豐稔農事勤有徵所期雨暘順
九有俱安寧微臣亦何幸侍從霑恩榮永言紀帝德萬
世昭皇明

獅子

聖朝統六合威德被遐荒鳥獸既咸若萬物霑恩光獅
子產西極雄猛非尋常鋸牙自鋸利銅首何軒昂雙耳
正上聳兩目耀星芒巨尾搖錦茸長毛絢金黃顧盼雄

風生哮噉百獸藏及茲來闕下俛首隨鵠行帖然自馴
服感此仁化彰玉堦齊率舞靈囿恣翱翔仰惟聖明世
物類皆踴踴永言樂熙皞天地同悠長

題賜上尊封識小帖

有跋

聖皇昔御西內時萬機多暇樂雍熙傳宣廷臣近玉陛
賜坐轉覺天顏怡親調異饌出金鼎八珍之味和羹糜
上尊九醞出天府瓊漿玉酪甘如飴內園朱櫻新薦後
粲若驪珠光陸離銀罌翠釜遞傳送闔室均得霑恩私

當時感激荷榮寵銘心鏤骨無窮期黃封題識最嚴密
洞庭春色何珍奇墨花如雲注霜璽龍香繞甕猶淋漓
恍疑晴霞隱玄霧朱文小篆蟠蛟螭尚書寶此弗敢置
錦箋玉軸加裝池虹光熒煌動四壁坐覺雨露添華滋
摩挲此卷倍增感何幸深蒙聖主知恩波浩蕩比滄海
聊寫悃幅成歌詩願公什襲同拱壁盛德榮名萬古垂
永樂庚子夏四月丙辰上在西內圓殿特召都督臣薛
祿尚書臣呂震臣李慶暨臣榮臣金幼孜至殿外命坐

賜食其羹糜蓋出於御前調和珍異非常且復有上尊熟
食酪漿櫻桃之賜厚德深恩難以云喻然所賜上尊封識
皆有墨印洞庭春色四字復用朱印篆書御用二字以蓋
其上思惟古昔聖帝明王解衣推食之意不是過也恩眷
之隆何其至哉今臣震謹以上尊題識封號裝潢成軸以
彰聖上之恩賜且欲傳之子孫以為珍玩復徵予言榮追
惟當時恩實同霑則今拜觀於此又奚容自默哉既為歌
詩以昭盛美復紀其實於後以識希世之遇云

元夕賜觀燈 四首

綵山高接九重天，珠樹銀花炫紫烟。
雲擁羣仙朝玉闕，星垂大地簇金蓮。
峯巒疊翠迴蓬島，羅綺搖光映御筵。
宴樂自知同在鎬，聖皇端拱萬斯年。

節臨三五雪初融，百尺峯巒接碧空。
十二樓臺春浩浩，九重宮闕月溶溶。
鳳笙龍管祥光外，珠樹銀花紫霧中。
再拜萬呼祈聖壽，年年慶賞萬方同。

六鼇擁翠出蓬瀛，火樹星毬綵結成。
萬燭光連金闕迥，

千花影綺玉階明雲邊鸞鶴來仙馭天上簫韶度曲聲
此夕內庭逢令節小臣何幸沐恩榮

和氣氤氲四海春金爐玉漏夜初分烟霞影炫浮丹闕
星斗光搖動彩雲月照錦粧千隊出風飄仙樂萬家聞
兩京樂事真難遇願竭丹衷答聖君

賜見東宮謝恩

天眷皇明萬世隆儲君育德在春宮祥雲曉接龍樓上
佳氣晴開鶴禁中恭覩堯眉呈八彩仰瞻舜目炯重瞳

微臣拜賜天恩厚補報深期竭寸衷

元夕賜觀燈詩

五首

海宇昇平日元宵令節時綵雲飄鳳闕瑞靄繞龍旗歌
管春聲動星河夜色遲萬方同樂事千載際昌期

閭闔䟽魚鑰瑤空結綵樓千花攢火樹百寶燦星毬良
夜承恩宴清時樂豫遊內筵稱萬壽歲歲奉宸旒

禁苑東風暖青霄月正中魚龍千隊戲羅綺萬花叢雲
嶠祥光麗星橋寶炬紅太平多樂事此夕萬方同

玉漏傳清禁華燈徹夜明
貝宮珠綴絡綵隊錦粧成
雲霧浮香氣簫韶合樂聲
願歌天保什萬歲頌昇平

象緯臨天闕瑤空集萬靈
雲霞紛掩映星斗疊晶瑩
寶地春應滿金門夜不扃
千官陪宴樂拜舞在明庭

隨駕幸南海子

天開形勢壯都城鳳翥龍蟠拱
帝京萬古山河鍾王氣
九霄日月煥文明祥光掩映浮金殿
瑞靄縈迴繞翠旌
聖主經營基業遠千秋萬歲頌昇平

恭侍御遊萬歲山

四首

萬歲山

翠巘龍從接上台黃金為殿玉為臺
歲蕤寶樹含空秀縹緲煙霞照日開
金露玉虹雲外聳方壺瀛島海邊來
聖皇歲歲宸遊樂百辟森森喜得陪

太液池

太液池深碧似苔溶溶漾漾自西來
魚翻翠藻噓輕浪鳥下青蒲絕點埃
影浸綵舟輕蕩颺光涵星斗自縈迴

願將一滴天瓢瀉散作甘霖遍九垓

小山

瑤空湧出秀芙蓉寶樹參差近九重波泛羽觴來玉澗
泉垂珠箔噴金龍四時佳氣浮丹闕八表晴嵐露碧峯
喜遇太平無事日共霑雨露沐恩濃

白兔

金門曙日正瞳矐白兔呈祥迥不同遠帶霜華依鳳闕
遙含月影出蟾宮清標好傍瑤臺上素色偏宜玉殿中

自是太平多瑞應願祈聖壽效呼嵩

五色鸚鵡

隴西有鳥名鸚鵡文彩輝煌快先覩九苞鳴鳳真可方
五色鸚鵡安足數翠羽紅衿何陸離錦膺綉臆尤瑰奇
迴翔自是多態度顧盼轉覺生光儀天賦美質獨含慧
巧舌能言世所貴相喚相呼多好音雙雙顧影真妍媚
上林日暖祥風輕啄食永得沾恩榮願效嵩呼祝聖壽
日日長聞萬歲聲

元夕賜觀燈

宣德三年

聖皇御極海宇清民安物阜天下平九重端拱敷化理
奇祥上瑞爭來呈是時佳節屆元夕思與臣民共懽懌
時勃張燈萬歲山錦綵輝煌臨太液層巒複嶂高崔嵬
祥雲瑞靄相縈迴懸知不借巨鼇力自是瀛島環蓬萊
重重疊疊因山勢綉谷丹崖何綺麗千樹銀花炫碧空
萬斛金蓮照平地星毬百寶巧粧成滉漾月華浮水晶
魚龍雜遝分綵隊笙歌迭進諧新聲聖皇垂衣臨黼宸

百辟趨陪瞻玉几暖風微裊御爐烟環珮鏘鏘彩雲裏
仙韶九奏音韻調和鸞駐驂天香飄皇情悅豫龍顏喜
萬國高呼祝帝堯微臣素懷葵藿志何幸遭逢盛明世
但願海晏黃河清聖壽齊天萬萬歲

嘉菊

內園植物真奇特一種秋花開五色瑪瑙歲蕤琥珀黃
胭脂隱映鉛華白由來託根得所宜造化生成雨露滋
喜見幽芳出上苑何須佳色羨東籬今晨拜舞承恩渥

詔命中官送館閣穠艷偏含曉日明貞姿獨傲秋霜薄
對此感激懷深恩嘗聞食菊可延年願祈聖壽齊天地
歲歲花開向御筵

賜遊萬歲山詩

十首有序

宣德三年三月庚辰上命尚書臣蹇義等十有八人同
遊萬歲山頃之中官傳旨許乘馬及將從者二人既入
東上北門乘馬及乾寧門下馬步出度橋中官導引登
山周覽復賜登御舟泛太液池賜茶及素羞十餘品而

凡蕩槳持楫者皆中使唱和合律既而抵新建圓殿地勢奇勝金碧照耀恍若身在蓬萊宮闕有間上乘馬至慰勞甚周臣等皆叩首稱萬歲上大喜徘徊久之特召臣士奇臣榮諭以天下無事雖不可流於安逸而政務之暇命卿等至此以開豁心目庶幾古人遊豫之樂不在拘檢也臣士奇臣榮叩首稱謝而退傳諭羣臣方憑檻觀中官擎舟網魚復有旨人賜御釀玉醅一甌飲復命乘馬遊小山行一里許上乘馬繼至羣臣匆促將下

馬迎持旨勿下諭中官人賜鈔三千貫從者人三錠且令
中官陪至小山飲饌盡醉而歸駕遂回未半里遇池中水
鳥羣飛上親發一矢中一鳥墜馬前諸臣方入小山門遙
見中官持鳥至傳命賜義等炙食之羣臣望闕叩首謝遂
徧遊小山觀二獅子裘毬并觀金龍噴水水簾及曲水流
觴之處皆雕琢奇異布置神巧莫不稱讚良久乃退坐松
栢間享酒饌皆珍奇之品中官相與勸酬甚懽酒未闌人
賜鸚鵡一將徹復賜從者酒食皆醉飽而歸及出西安門

天已暝抵家更初鼓作羣臣莫不感恩懷德以為萬世之
奇逢翌旦臣義等方相率詣御前稱謝而中官傳旨免謝
羣臣不勝惶恐感戴天恩之至臣榮竊以為君臣相遇自
古為難昔唐太宗之世房玄齡輩十八人得承寵眷時以
為登瀛洲至今相傳以為盛事臣榮何幸遭際聖明夙夜
兢惕深以弗克報稱為愧伏蒙聖上不以臣榮不肖為嫌
屢錫寵恩獎諭甚至今復得預斯列恩榮之盛無以復加
敢不勉盡心力以圖報效於萬一乎因不揆蕪陋謹賦五

言律詩十首以述皇上眷待臣下恩禮之隆以紀羣臣
遭際之盛且使後之為臣者有所勸勉焉

瓊島宸遊日隨遊切九重天恩許乘騎仙仗從飛龍迤
邐雲霄近汪洋雨露濃詞臣何慶幸千載得遭逢

太液春波暖承恩泛綵舟輕盈蘭棹發蕩漾玉虹流簾
影移宮樹茶香出御甌此中多勝景況是從宸遊

翠巘開新殿團花簇玉闌醇醪天上賜仙境御前看浩
蕩恩波潤光榮禮數寬微臣沾聖澤何幸侍金鑾

奉詔隨鸞馭遨遊遍小山風光連禁籞花影覆清灣路
繞金宮轉雲隨綵仗還紫騮如掣電倏已度仙關

猛獸來西極低徊御苑中爪牙真猛捷毛骨獨竒雄寶
樹橫金鎖珠毬結綵茸從容看率舞還想有虞風

玉潤通泉脈金龍噴雪花崢嶸山骨潤淠漾水簾斜暝
色凝飛雨清聲隔綵霞此中塵不到應即是仙家

水鳥多馴狎偏隨綵仗飛六龍迴御輦一箭落毛衣珍
味同霑賜儒冠倍有輝獨慙無寸補遭遇古來稀

松栢清陰滿林間列宴時玉階分御賜仙醴泛金卮翠
釜駝峰異雕盤鱠縷奇恩同天地濶恩報永無涯
珍禽來異域分賜出雕籠稟質生尤異能言類莫同宴
遊逢盛世恩眷自宸衷感激應無極懷思意不窮
四海同熙皞宸遊樂太平綵雲隨御輦瑞日照霓旌賜
賚何稠疊霑承感聖明永言歌帝德千載播鴻名

賜遊東苑詩

有序

洪惟皇上恭膺天命嗣承大統宵旰孜孜以圖至治萬

幾之暇每御便殿延見儒臣講論古今移時乃罷此與古先聖帝明王同一揆也何其盛哉乃宣德三年戊申秋七月十有一日召尚書臣蹇義臣夏原吉臣楊士奇臣榮同遊東苑夾路嘉植榮茂芬敷前至一殿棟宇宏壯金碧相輝其後瑶臺玉砌奇石森聳環植花卉清香素豔穠郁可愛又有方池引泉其中玉龍吐水其高盈丈噴激下注入于石渠直透殿內兩旁石溝溝之首圓轉各有二竅並列其一水貫其中委曲縈迴復流至第

二竅乃入于池直通殿外石池池之中奇石屹立不假雕琢宛若升龍之狀上有四竅以通泉脈而常閉之啟其竅則水皆湧出直上盈丈與殿後石龍吐水相應池之南又有臺高數尺森列異石植以花卉紛披掩映殿陛之前復有二石左如龍翔右如鳳舞天然奇巧宛若生成初上御殿中召臣等與語政務良久乃曰此旁復有草舍一區乃朕致齋之所非敢比古人茅茨不剪之意然庶幾不忘乎儉矣卿等可徧觀於是中官引臣等

先至一小殿梁棟椽桷皆以山木為之而覆之以草四面闌楯亦然不加斲削小大渾然林木參差蔚然可愛稍西有路紆迴荆扉蔽護既入則有石甃之河南有小橋覆以草亭左右復有二草亭各枕橋而度東西去遙望宛若台星其下皆水遊魚沈浮各適其所中為小殿其後有廊以通後堂東西有齋有軒以為彈琴讀書之所悉以草覆之四圍編竹為籬籬下皆蔬茹匏瓜之類觀畢上臨河命舉網取魚連得數尾令中官具酒饌以

此魚作湯賜食既而召臣等至前賜以金幣條環玉鈎
等物遂賜宴于東廡珍羞異味不可勝計復被旨令各盡
醉而歸既歸已暝恍如造蓬萊方壺之上瑤池弱水之間
也何其幸哉臣仰惟皇上之德如天地之大滄海之深顧
以臣之謏陋叨居禁密之地寵眷實隆曷能補報於萬一
夙夜祇懼惟恐弗勝今屢蒙恩遇之厚賜觀內苑有同遊
之樂相得之美以臣之愚何以臻此是用不揆蕪陋謹為
五言古詩一首凡四十韻拜手稽首以獻其詩曰

聖皇嗣寶厯日表龍鳳姿典章率由舊制度仰成規
萬方罔神化四海樂雍熙維時屬秋序暑退生涼颼
萬幾既餘閒行樂適在茲從容召儒臣內苑同遊嬉
戕戕黃金殿璀璨白玉墀廊廡鬱周迴金碧光陸離
茗堯珊瑚石瑤草間瓊枝玉虹出西山泉脈何逶迤引
流入東苑滉漾涵方池蒼龍忽蜿蜒吐水一何奇飛流
濺碧空爪甲何淋漓形態本天成雕琢寧用施異石既
磊落奇葩自歲蕤蓬島非可儼天宮信能移少前造幽

境似與林壑期草徑自森邃
蔬畦亦紛披殿宇靡華飾
儉朴同茅茨伐材為曲檻
編竹成疎籬小橋橫碧流
短亭瞰清漪游魚時出躍
花木向朝曦致齋誠得所
燕息允相宜翠華此臨幸
鳳蓋簇鸞旗聖情歡未極
錫宴荷恩私雕盤列珍饌
內醞浮金卮既醉增感激
愈覺心神怡賜賚何駢蕃
交錯粲相輝金幣雜香環
玉鈎繫青絲愚臣本微陋
忝遭聖主知顧茲益懷懼
於國何所裨經邦乏嘉猷
輔理寧有為叨陪鼎鼐間
詎免竊祿譏夙夜

弗遑暇竭力効驅馳傾心嚮太陽如彼藿與葵海嶽高
且深涓埃豈能資但當祝聖壽垂拱朝四夷歲歲悉豐
稔民物益蕃滋此生亦何幸際茲堯舜時拜稽頌皇仁
願繼南薰詩

白鹿

古稱瑞鹿真奇特千載為蒼始為白只今北牡自天成
并毓小麋皆雪色斯實吾皇聖德純四方八表俱回春
產茲素質表神異胚胎便覺超凡羣金精降靈天所錫

百獸珍奇孰能匹貢來玉陛殊未知立近瑤臺恍難覓
乃知造化之所為欲與彩鳳同來儀小臣作歌獻丹宸
願續文王靈囿詩

神功聖德詩

有序

宣德三年秋八月戊申皇上以農事之暇躬率六師巡
歷邊疆嚴固守備九月辛亥師駐石門遽得邊報云北
兵南侵已迫近境天威震怒即召將帥諭之曰蕞爾殘
兵輒敢侵逼適朕在斯誠上天之佑助事與機會不即

勦滅終遺後患爾等率領大軍隨後以進至關而止朕躬率鐵騎三千倍道兼行以勦平之待有勅召爾等即來臨發復召諸將示以神算且謂我軍必勝敵人必滅理勢昭然在此一舉衆皆稽首呼萬歲而退越四日乙卯度喜峯口風日和明藹然如春士馬騰躍行將七十里間敵人與前鋒接戰上不以路之險峻河之間阻徑率鐵騎馳赴之士率協心勇氣奮發如電驅雷擊望敵疾馳若有神助遂衝賊陣手射死強寇十餘人麾左右

翼禽其酋長百餘并射殺斬馘賊黨無算餘衆披靡奔潰即下令軍中搜捕山林直擣牙帳乃盡收其人口兵器馬匹牛羊輜重倒載而歸烽烟無警邊境以寧臣榮自惟一介草茅素無寸補伏蒙皇上寵任屢厪眷顧當出關勦賊之際扈從文臣武將多弗得與特命臣榮侍駕前驅日在左右時時慰勞以酒食天語丁寧誨諭諄切臣榮雖粉骨糜身何能補報及今隨侍回京夙夜思念聖恩深重不能自已矧惟皇上以神武之資英明果

斷威德所及無遠弗服今茲獨以三千之衆橫行塞外
剪滅強敵數萬神功聖德足以光昭祖宗震服天下魏
魏乎萬世太平之功業豈特為一時之盛美而已哉遂
不揆淺陋謹以耳目所聞見者立題追述當時歷履共
賦七言律詩一十五首拜手稽首上獻顧不足以鋪張
皇上神功聖德於萬一抑可以少紀其實以示夫後之
人焉

巡邊

天子時巡遂出京桓桓貌虎擁邊城風雲動色隨行帳
日月回光繞御營萬里戈矛橫殺氣六軍輦鼓震天聲
懸知朔漠烽烟靖願頌神功答聖明

閱武

聖主戎衣振武功六軍意氣總驍雄帳前戈甲飛騰處
塞上風雲指顧中赫赫天威臨御宸稜稜殺氣亘晴虹
枯摧朽拉應無敵四海謳歌樂歲豐

得邊報

聖心慮遠飭邊陲正值農功休暇時塞外風烟朝乍警
帳前羽檄夜交馳神謀誕布由先定睿算應知不少遺
鐵騎驍騰真勇敢茲行破敵更無疑

駕渡灤河

虹橋雙架輦初過天意潛孚氣候和飛騎豈知河有石
游魚偏愛水無波微颺不動兵威肅化日纔舒士氣多
此去定知旋奏凱六軍行處聽鐃歌

出喜峯口

崔嵬絕壁勢爭雄，破敵機謀出聖衷。
雉堞遠橫千嶂外，鸞旂遙度五雲中。
飛騰鐵騎兼程進，散漫穹廬掃地空。
仰荷天威清朔漠，凱歌懽動六軍同。

踰偏嶺

天遶絕巔勢宕寬，玉削芙蓉入望遙。
風動鸞旂迎瑞日，雲隨鳳駕度晴霄。
石林曉霽千峯秀，塞草秋深萬馬驕。
此處登高成壯覽，華夷共仰聖明朝。

度萬塔黃崖

金石錄卷一
怪石巉岩聳碧空浮圖高出勢穹窿邊城百草經霜白
御帳千旗絢日紅天氣喜逢晴不雨曙光偏覺靜無風
侍臣幾度承恩厚顧問時時到幄中

度駱駝嶺

山勢龍從類駱駝危峯嶮峻少平坡上浮暝靄侵層漢
下俯寒流近小河佳氣葱葱隨御帳兵威赫赫擁天戈
宸謀指日殲殘寇佇聽旋師奏凱歌

次會州

樓堞連雲地勢平
昔年曾此築高城
平蕪渺渺當時路
古木蒼蒼舊日營
笳鼓聲中涼吹發
旌旗影裡夕陽明
殘兵假息應無地
一掃欃槍大漠清

破敵

三千鏃騎氣如虹
勅敵紛披計已窮
邊塞杰魁俱就縛
窮荒巢穴悉為空
仰知聖慮恢神算
自是天威振武功
大駕回鑾歌奏凱
懽聲喜氣萬方同

重九

關塞秋深灝氣清正逢佳節駐行營天回玉帳三軍肅
地接龍沙萬里平白草帶霜經物候黃封賜酒荷恩榮
聖王駐馬功成處百萬旌旗耀日明

諸將繼至

是夕微雪即晴

黠寇憑陵逼塞城天兵擒滅祲氛清六花獻瑞寒光薄
孤月流輝夜色明萬里旌旗回御輦千官劍佩集行營
時巡已喜安邊境定挽銀河洗甲兵

賜觀獵

戎衣躬御武功成
百萬熊羆訓練精
馬上鷹鷂思奮擊
林間豺虎敢橫行
天威霽曉三軍肅
霜氣澄秋四野平
倏見平原狐兔盡
饒歌載路喜歸營

賜觀射虎

渺渺平川百草空
於菟出沒勢偏雄
氣凌猛騎應難搏
身斃彫弓計已窮
日色蒼涼沙磧外
天威炫赫塞垣中
臣民共仰龍顏喜
神武由來孰與同

班師

邊城巡幸駐天兵鐵騎如雲勢莫嬰一鼓即成除暴績
六軍俱奏凱歌聲遠頌鳳詔初回馭遙奉鑾輿喜入京
聖主實同天地德萬年一統樂昇平

早朝

禁城初曉曉鐘聲天仗森嚴簇繡楹風引御爐香霧遠
雲開仙掌日華明班聯冠佩瞻龍袞樂奏簫韶叶鳳鳴
聖主正當垂拱日萬方鼓舞樂昇平

題御賜黃封

積雪凝暉遶建章黃封勅賜有輝光
醅浮寶甕雲霞色
醉濕宮袍雨露香周室治平開宴樂
虞廷歌詠協明良
鼎湖悵望龍遊遠追想深恩淚滿裳

賜觀擊毬射柳

禁苑薰風顥氣清天閑龍馬玉蹄輕
花邊遠近星毬落
柳外參差綵仗橫演武正期防逸樂
詰兵端欲保昇平
微臣侍從慙無補願效膚歌頌聖明

雲移仙仗簇龍旗正是京華五月時
駐蹕近依丹鳳闕

彎弓遙剪綠楊枝萬年仰祝齊天壽百步欣看中的奇
神武聖文超往古微臣何幸際昌期

賜扇及綵縷

海宇熙熙景運昌君臣千載慶明良遭逢喜際風雲會
賚錫常沾雨露香寶扇半規凝瑞色綵條百結帶恩光
皇仁似海真難報願捧宮筵萬壽觴

郊祀分獻宿神樂觀

駕次南郊展祀時千官扈從肅朝儀瑤臺露下天花散

玉宇春回斗柄移天樂佇看來彩鳳齋宮又見產靈芝
微臣何幸陪裡祀恭拜彤庭一獻詩

瑞應騶虞詩

有序

宣德四年春正月初吉騶虞二見于南京畿內之來安
縣守臣得之以獻白質黑章虎軀狎首尾參於身穆穆
眈眈內仁外威信治世之瑞獸也謹按瑞應圖曰騶虞
義獸也王者德至鳥獸澤洞幽冥則見又云騶虞白虎
黑文不食生物不履生芻人君有至信之德則見欽惟

皇上紹承大統主宰神人仁恩被于庶類信義孚于四海是以萬方底寧率服嘉祥異瑞層見疊出騶虞二同獻于朝寶國家莫大之瑞稽之史籍曠古所無自非皇上至誠之德洞徹幽顯天地神明協相有以廣彰聖化昌克致之臣忝職冬官躬逢上瑞是用播之詠歌以昭國家萬萬年太平隆盛之慶謹百拜稽首而獻詩曰

聖皇御宇天下寧玉衡維貞泰階平雨暘時序百穀登泰和氤氲毓嘉禎粵產瑞獸仁且靈素質黑章粲精英起

伏馴擾行不驚白雪被體玄雲凝性仁不折生草莖步
武所至祥風生岳祇撫呵肅林垌靈光和氣相迴縈群
獸導引紛前行丹壑吐媚泉流瓊草木茁秀山增榮卿
雲下垂煜熒熒文軒載之獻帝京臣民縱觀溢都城嘉
氣滿路騰懽聲聖主端拱坐天庭駿奔百辟公與卿上
章揄揚古是徵揆厥所由咸頌稱華夷萬方仰聖明奉
天法祖篤孝誠皇仁如天育黎氓好生之德覃八紘下
及萬靈上太清四民安居品物亨女勤蠶織男力耕父

父子子弟與兄比屋禮讓宗忠貞普天率土瞻儀刑上
帝監觀歆德馨嘉祥奇瑞來相仍聖心乾乾戒滿盈臣
下遵職惟弗矜維此瑞獸遠來呈寶表聖德洞幽冥愚
臣感恩懷戰兢懽呼抃舞倍恒情上祝聖壽萬萬齡如
川之增日初升皇圖鞏固永世承

喜雨

聖皇嗣統登九五和氣周流遍寰宇忽因茲歲氣候乖
自春徂夏天少雨四郊農人念西疇亢旱何由望有秋

九重孜孜重民食宵旰弗暇心為憂由來一誠能感格
上天覽觀昭聖德百靈叶順同駿奔揮叱雨師走風伯
空中殷殷雷發聲飛電歟翕騰光晶神龍一夜捲滄海
化作甘霖沛若傾炎埃洗盡見行潦萬物焦蘇免枯槁
朝來四野沸謳歌旱魃消除迅如掃仰惟聖德格昊天
遂令四海為豐年微臣作詩頌聖德願和康衢擊壤篇

賜遊西苑詩

有序

宣德八年夏四月二十有六日皇上以時清氣和特命

中官導引成國公臣朱勇等十五人遊西苑臣榮叻與其列遂得周覽奇勝首至新構圓殿殿臨太液池池之中多嘉魚殿之左右多名花東去數十步又有嘉蔬奇果皇上每躬自採摘以奉聖母皇太后甘旨繼至清暑殿此亦奉聖母遊覽之所規制宏敞巧妙天然花木森鬱實非世間所有既而登萬歲山池水環之如壁磴道逶迤奇石森列千形萬狀莫可備述山之中有三殿正曰仁智左曰介福右曰延和稍上則有玉虹金露方壺

瀛洲四亭而廣寒殿在其頂瑤臺玉砌畫棟雕甍蒼松
翠栢盤鬱垂蔭恍然如在蓬萊仙境也良久退坐山下
勅賜內庖酒饌皆珍奇之品臣等莫不醉飽而歸臣
榮伏思皇上之恩天高地厚曠古以來所未嘗有而臣
以一介草茅幸際聖明屢沐恩遇夙夜兢惕深以弗克
盡職為媿茲復得預斯列敢不竭盡心力以圖報稱用
是不揣蕪陋謹撰古詩一首上進伏惟聖覽

南薰淡蕩微雨晴時當首夏天氣清苑中風景最佳麗喜

見萬物皆敷榮詔賜公卿暫行樂乘馬肩輿各恭恪入門
步履不敢馳遙望瓊峰翠如削須臾中貴傳宣來先向池
上看崔巍長橋如虹跨碧水波光蕩漾無纖埃寶殿玲瓏
聳金碧盤龍舞鳳何輝赫近堦古栢凌雪霜夾道蒼松
翠千尺池有遊魚圃有蔬絳桃丹杏如珊瑚常時採摘
奉聖母青春幾度來鑾輿細柳新蒲滿洲渚輦路逶迤
到清暑瑤闌玉檻勝蓬萊芝草琅玕似玄圃中有寶閣
環金扉聖慈暇逸時遊茲千花冥濛溢香露瑞日照耀

生光輝相將優遊陟華嶽磴道盤空應百轉巉岩怪石
虎豹蹲歲久含滋多碧蘚方壺瀛洲峙兩亭玉虹金露
何崢嶸空中忽聽玉笙響萬壑遙度松風聲躋攀絕頂
意忘倦忽到丹霄廣寒殿恍覺臺高爽氣多更看天近
祥雲見壯哉此景天下奇此身何幸親見之天恩曠蕩
錫宴樂玉酒滿酌黃金卮聖皇仁明盡誠孝四海生民
安德教微臣欣得預茲遊際遇昇平何以報瞻依日月
拜九天寸心感激惟惓惓永歌天保厯祝頌聖壽皇圖

金史紀事本末
卷一
萬萬年

隨駕謁長陵獻陵

韶光融融麗晴昊萬彙昭蘇春正好聖皇孝敬出宸衷
恭奉慈輿謁陵廟方今六合皆同春聖皇大德霑被均
誠由聖母秉至仁天心悅鑒人懽忻翠華晨發隨鳳輦
香飄藹藹祥雲絢平原廣路淨纖埃夾道蒿呼紛舞抃
引望二陵松柏路霧斂雲開待皇輅榮盛豐備禮有儀
對越之誠存永慕陵前旋駕仍徐徐陵旁部屋多民居

洪恩錫賚何稠疊山童野叟皆懽娛孝誠上格神靈喜
甘雨應時霑遠邇聖母怡愉感帝心臣庶蒙恩均拜賜
我皇聖德協天機聖母洪福與天齊小臣何幸扈清蹕
願祝萬壽歌雍熙

上元賜觀燈

鑾輿臨御九門開耿耿星河繞玉臺百辟陪班天表近
六鼇擁翠月華來簫韶樂奏更籌靜寶篆香飄淑氣回
影動翠雲連罩罩光浮玉殿映果懸千枝火樹霞凝彩

金匱要略卷之三
百寶星毬錦作堆銀燭夜光仍燦爛瓊花春發孰栽培
謳歌迭奏清平調詞賦爭呈白雪才紫陌已令嚴禁弭
銅壺莫遣漏聲催龍顏有喜頻頒宴鵷序承恩得共陪
霑沐小臣無補報只將歌頌獻蓬萊

恭和御賜春山圖詩

有跋

畫裏雲山宛逼真紫宸揮洒墨花新微臣願效封人祝
聖壽如山萬歲春臣榮欽蒙賜春山圖一幅并御製詩
題于上伏惟春者四時之首山則仁者之所好也人之

仁即時之春天以春生萬物皇上以仁育萬物其德一也詩曰維其有之是以似之由此而觀斯圖豈虛作哉臣榮不勝感激謹拜手稽首恭和聖製而謹識于其後庶幾子子孫孫永世弗忘所自也

恭和御製竹石圖詩

有跋

植物紛紛著兩間雲根新長碧琅玕聖恩發育同天地願秉堅剛獨耐寒臣榮伏蒙恩賜竹石圖一幅并題詩其上臣竊惟物之勁直而堅剛者莫竹與石若也人能

秉勁直之操堅剛之質則撓而不屈磨而弗磷然則臣
蒙是賜者豈非叨受知遇而欲其婉美於是乎臣榮其
敢不加勉以副聖意之萬一哉輒不自揆僭賡睿作并
贅數語于左方以彰恩德於無窮焉

歌行

喜雪歌

聖皇御天敷化理民安物阜天心喜九重垂拱萬方寧
唐虞熙皞真堪擬維時隆冬臘日後同雲陰陰遍遐邇

一夕天風吹雪花漏徹更闌還未已初疑巽二先驅來
呼號奮發如奔雷忽然夜深萬籟寂六花片片空中開
朝來碧空澄霽色寒光恍映瑤階白瓊樓玉宇粲相輝
積素晶瑩連四壁趁朝矚目縱遐觀蓬萊宮闕凝清寒
由來三白為佳瑞自是陰陽叶和氣方今何幸際明時
謳歌擊壤無休期嘗聞治世已歌慕況乃于今親見之
我皇登三仍邁五聖德歸功在匡輔賡詩願奉萬年歡
永享天心符聖祖

白象歌

聖皇聲教被八荒乾坤和氣儲嘉祥遠人效職貢方物
萬里厥篚來梯航南邦白象生特異粲然遠自占城至
殿頭旭日眩雙牙階下微風生兩耳特超羣隊毛質純
月下渾疑霜滿身不由林邑渡滄海却趨千官拜玉宸
周章跪舞見天子重瞳屢顧龍顏喜晴霄遙晃雪花明
拂曙銀光靜如洗食以瑤草飲醴泉赤麟朱鳳參後先
惠養欣登上林苑馳逐不記天南端從茲出入近金殿

仙仗徐行乘御輦
太平聖祚億萬年
載詠歌詩播悠遠
神鹿歌

神鹿來從番國符
盛治呈遠物
神鹿來經萬里涉波濤
超峻崦神鹿來色玄素
光濯濯氣嘔嘔
神鹿來膚充盈
飲玉泉嚼翠英
神鹿來獻天庭沐光榮
駕龍輶神鹿來
仰皇明昭至仁
協嘉禎

瑞雪歌

聖皇御統天眷隆
四方萬國皆來同
祖宗敷佑靈貺錫

雨暘順序民物豐維時嚴冬氣凜冽同雲布空陰靄結
天教三白應奇祥一夕都城飄瑞雪沈沈萬籟寂無聲
片片銀河剪水成凝華迥接瓊樓近積素恍與瑤堦平
乾坤萬里纖塵息四望冰壺同一色沙鷗羣泛黯藏輝
林鶴孤飛杳無迹由來瑞雪兆豐年況此呈祥當臘前
聖心夙夜念民瘼自有精神格昊天微臣淺薄遭明主
調燮無功愧何補幸茲六出應期至拜舞龍墀欣快覩
聖情謙抑恒戒盈仰承天意惟兢兢作詩惓惓飭臣下

賜以華宴當彤庭羣臣感恩咸稽首際遇明時古無有
賡歌願效有虞風上祝齊天萬歲壽

來遠人討不庭二章

有序

伏惟聖朝恩威廣被遐邇歸心滿刺加國王效順率其
眷屬全國來朝錫蘭山國王梗化遂致生擒獻俘闕下
此皆古所未有臣等欣覩盛事不勝欣懌敬作歌詩二
章上進亦續風雅之微忱也

皇施仁浩無垠普天率土皆王臣島夷卉服咸尊親如彼

葵藿迎朝暾滿刺加處海濱道里遼絕世罕聞使者過之
忽咨詢老稚稽首怖且欣挈妻孥從臣隣遠涉鉅海趨天
津不憚險遠謁楓宸方物上陳兼異珍琛貝絢爛雜寶薰
服食器用羅續紛吾皇慎德期日新豈在玩好勞晨昕萬
邦黎庶歸陶甄嘉此島夷忠且勤萬里效順輸瑤琨聖皇
懷柔道彌敦大官宴之酌以醇錫以內帑綺與纁遠人屏
營望天門喜瞻中國明聖君仰聆天語何諄諄感茲蒼穹
雨露均小臣何幸沾洪恩稱聖壽億萬春

右來遠人

天威所加海宇清
皇華四牡擁旗旌
樓船穩駕天風輕
洪濤巨浪寂不興
蛟龍遁跡海若驚
錫蘭夷敢自矜
爾小島聚飛蠅
依山環海為垣城
使節經沮弗行狼
貪虎視驕且盈
恣逞悖逆勢縱橫
悉驅其衆將奮兵
王師桓桓勇足勝
以一敵百氣莫嬰
直擣巢穴破其營
擄其全國歸神京
婁族屬靡有羸
汎掃凶孽如控莖
楊大艤笳鼓鳴
錦帆高掛開滄溟
馮夷拱衛河伯迎
獻俘闕

下衆目瞠微軀萬死惟戰兢孰知天意覆八紘不以小
醜干天刑神武不殺全其生以首叩地聲愴惇感聖德
歌皇明

右討不庭

詞

西江月

端午賜觀擊毬射柳五闋

芳樹海榴吐艷碧池荷葉鋪錢端陽佳節太平年百辟
咸沾恩宴仙仗遙迎瑞日爐香細裊祥烟香蒲泛酒

艾旗懸拜舞金鑾前殿

御座正臨仙苑禁林大敞瓊筵臂間長命綵絲纏何必
靈符丹篆處處龍舟競渡家家簫鼓喧聞萬方無事
樂豐年仰荷聖明恩眷

內苑場開紫禁瑤臺佩列羣仙兩朋駿馬總騰騫玉勒
金羈光炫左右分曹決勝毬飛仗擊爭先流星一點
影迴旋揮霍紛紜萬變

簫鼓教坊間奏錦袍玉佩聯翩綵毬擊罷聽傳宣競挽

璚弓飛箭 柳外爭誇中的花前捷報飛傳香塵起處
正回鞭萬歲嵩呼舞抃

令節新頒寶扇嘉言揮灑雲箋香羅細葛疊相鮮劍佩
趨陪金殿 臣庶欣逢舜世華夷共祝堯年皇圖鞏固
福綿綿磐石尊安永奠

瑞鶴仙 元宵詞五闋

三山浮海上忽六鼇移來高聳萬丈祥雲護仙掌看峰
巒幾疊洞天相向烟霞滉漾勢凌空奇姿異狀見丹青

翠色崔嵬特起十分雄壯
凝望瓊裝萬樹綉簇千花
倚天屏障羣仙慶會三島上共懽賞有飈輪鸞鶴飄飄
天際羽蓋繽紛綵仗向金門宴樂良宵太平氣象

滿庭芳

玉殿傳宣金吾弛禁皇都春意爭妍暝烟初歛華月吐
嬋娟紫陌香塵冉冉六街上車馬駢闐爭來看鼇山燈
火滉漾九重天
聖皇端拱處千官鵠立玉笋班聯有
歌喉宛轉舞袖蹁躑清漏迢迢夜永不妨對綺席瓊筵

金匱要略卷之三
卷一
嵩呼願齊天萬壽同樂太平年

應天歌

星馳一線寶炬騰空千花一時開遍萬斛金蓮恍似紅
粧映波面香風轉雲半捲見舞袖翩翩輕旋想勝景即
是仙宮蓬萊閬苑歡樂意留戀歲歲年年長沐賜宴
五色紅雲瑞氣祥氛互蔥蒨移鑾輅開雉扇仙仗擁九
華春殿向黼戱更祝南山壽觴頻勸


醉蓬萊

近天階咫尺雲擁千官動搖環珮仙樂聲高似飄飄天
外羅綺香穠珠璣光粲看紅粧千隊銀漢低徊月臨仙
掌星垂華蓋 覩此繁華古今應最禁苑中此夕同懽
會海上三山與金莖相對寶馬香車九街馳逐遍五城
欣快聖壽齊天年年歲歲嵩呼羅拜

畫堂春

春空雲盡月華明雪消纔放新晴元宵遊賞遍都城處
處歡聲 丹禁九重宮闕綵黿三島蓬瀛萬方玉帛會

金台先生集
卷一
瑶京同樂昇平



文敏集卷一

欽定四庫全書

集部
文敏集卷三

詳校官編修臣裴謙

中書_臣劉源溥覆勘

總校官中書臣朱鈐

校對官學正臣常循

謄錄監生臣劉廷勳

欽定四庫全書

文敏集卷二

明 楊榮 撰

四言古詩

雙松堂

鬱鬱雙松植于堂傍誰其植之維色之氓維侯在官佐
理有方桃李滿城春日載陽侯善愛民不擾不攘俾之
樹藝禴祀烝嘗民亦愛侯植材孔良俾侯之壽既堅且
剛匪茲歲寒傲睨風霜碩大蕃衍為棟為梁樹之斯今

維侯翱翔何以比之召伯甘棠

廣壽堂

有序

前太醫院使韓氏公茂居姑蘇時嘗名其堂曰廣壽蓋取其醫術以濟人之意也及事今上於潛邸謹厚小心甚見知遇由是名益著而術益顯永樂初遂擢前職嘗慨然以為人之壽雖稟於天然而不知戒謹或為七情之所感六氣之所傷往往致疾以夭閼其天年者不可勝數惟吾醫之道可以濟之而使皆得以臻其壽又嘗

恐其所施者狹而世之抱疾疾者多不能以廣愛而兼濟之廼於南京復築堂仍揭其舊扁思有以溥其惠澤焉嗚呼公之心亦仁矣哉公既歿其子伯永承先蔭為御醫與予同以危從留北京謁予言以題其卷子曩與公同朝交遊往還於兩京之間有年矣公之所以推仁濟物而惓惓於廣壽者皆予之所聞見而知之之審者然則於伯永之請又烏可以無言乎遂為序次其概而系之以詩曰

翼翼高堂有華其構匪堂之華惟以廣壽壽之脩短實

出於天何以廣之惟醫之全六氣所干七情所觸沈痾
危亡厥壽斯促念茲短折曷由濟之聖神立教莫切於
醫猗歟韓氏忠獻之裔世居姑蘇民受其惠惟公承之
荷國寵恩典職從容出入金門惟公之心憫此抱疾活
人孔多曾莫之靳公既逝矣高堂猶存匪公廣之有子
有孫子孫繩繩壽考益廣積此陰功厥報斯享求公之
德實在斯堂播之詠歌永世其光

五言古詩

溪山清曉

晴波何瀾漫碧嶂自深窈晨光發遙岑爽氣動林杪雲
際落飛泉谷口聞啼鳥恠底風露清微茫楚天曉

辭劍圖

楚人購亡命伍生亟奔吳蒼黃及江溪欲渡乏艚艫江
流漫浩浩千里豈易逾形勢轉危迫惻惻重躊躕漁父
識其情毋乃為子胥拏舟以濟之倉忙有追逋開樊縱
羈禽汲水活涸魚急難古所然矧彼非凡夫悠然遂安

涉出險登夷塗感佩意氣厚報贈良難圖聊解百金劍
以謝重生軀所志哀公子珪爵吾奚需殷勤辭弗受臨
分立斯須願言慎自保毋使他人狙高風邈千載俛仰
隘八區撫卷懷其人伊豈尋常徒

望雲思親

悠悠天際雲卷舒無定跡懷哉游子心引睇增歎息慈
親在高堂鶴髮已垂白春暉寸草微暮景桑榆迫祿養
豈不豐何由奉顏色冉冉時序遷迢迢關河隔瞻彼孤

雲飛親舍在其側徘徊騁遐盼欲往焉可即瞻茲名位
崇夙夜盡所職庶以為親榮孝思永無斁

承恩堂為少師吏部尚書蹇公賦

聖皇撫泰運世道登隆平孜孜求代理期與唐虞并仁
恩及臣下勉其效忠誠協恭勤贊翊恢化於八紘錫禮
日優渥羣賢萃盈庭惟公國元老先朝著徽聲經綸資
碩德宣亮推耆英九重獨眷注百辟皆儀刑恩賚出異
數特以表清貞乃命相吉地治宅當南城陶堅與掄良

所司為經營百役欣奏技刻日工有程突然成甲第重
門樹干旌華采承日耀輪奐規制宏錫宴集朝貴遂以
承恩名煌煌揭斯扁匪徒誇世榮公心循古道不愧邦
家禎惟昔伊摯氏佐商任阿衡致君比堯舜推澤及庶
氓一夫有不獲惕然疚在膺又思杜陵老所念在蒼生
常欲得廣廈列置千萬楹大庇諸寒士使遂歡樂情惟
公遇明主翊運當嘉亨祿崇績彌茂自視如弗勝方今
海內外生齒何烝烝博施以濟衆往聖病未能周文莫

區夏惠愛先孤惇重華保至治稷契同兢兢聖德超古
昔賢括為股肱千載一遭際六合清以寧尚思廣聖澤
仁化盛流行遐邇悲霑被謳歌頌皇明始終惇此念鴻
恩世永承

壽萱堂為鍾指揮題

羨子文武才出身事明主乘時際風雲臨戎擁貔虎偉
哉樹奇勲榮華耀簪組嚴親既云徂致力養慈母高堂
種萱花綠葉何涓涓朝日畫簾深春風綵衣舞承歡介

眉壽華觴泛清醕天倫有真樂和氣藹庭宇紫誥錫榮
封聖恩自弘溥分閭肅江漢移節鎮荆楚桓桓仗天威
韜畧足禦侮丹心秉忠義報國誓相許願言慎始終芳
名播千古

洪厓山房為胡祭酒題

豫章古名郡洪厓出西山雲霞紛照耀鸞鶴相往還長
松倚絕壁垂蘿不可攀聞昔有仙人於茲煉神丹功成
蛻汙濁逍遙白雲端君家住城市卜築思岩巒翠林延

朝光靈籟生夜寒石田不播穀所產皆琅玕自從領鄉
薦振衣遂彈冠鳴琴宰花縣載筆登金鑾英才樂教育
討論孔與顏竭來寄遐想緬彼洪厓間蕭然絕塵俗景
物幽且閒陽厓被春華陰壑含風湍何時返初服於焉
賦考察我欲覽奇勝相從以盤桓幽期倘可遂膏車扣
柴關

題楊諭德東臯春雨圖

春至時雨降駕言向東臯驅牛種嘉苗稂莠亦以薈所

期歛獲豐詎辭筋力勞時復事簡編或以酌醴醪熙然
隴畝間此樂一何高掛冠未有期南望徒鬱陶託此寓
幽意毋使心忉忉

貞壽堂為陳侍講賦

高堂有慈母早歲失所天
煢煢撫遺孤辛苦人共憐
孤年既以長篤志勤簡編
蜚聲列科目接武瀛洲仙
沾此祿養榮綵服何翩跹
芝蘭與玉樹滿眼羅曾玄
愛日有餘歡絲竹宣綺筵
悠哉桑榆景永矣樂長年

題劉教諭兩山書堂

左峯儼飛蓋右峯如聚轂兩峯並高寒對峙氣清淑羨
爾志沖澹於焉構書屋中藏萬卷餘琅琅時誦讀素燈
深夜雨瀟瀟響梧竹豈無青藜翁殷勤訪天祿白雲東
西飛蒼翠宛在目于茲移教鐸遠度松溪曲靜對湛盧
清難忘故山麓寫此寓高情尚慕紫陽躅

題童傑所藏登瀛圖

亡隋亂天紀生此龍鳳姿賢豪從如雲英聲紛四馳啟

祚邁前古致治恢弘規巍巍文學館冠蓋肅光儀謀猷
過元凱匡輔猶臯夔才華夙所重魚水樂無涯從容進
忠讜遇合真有為更番直丙夜討論集良時房杜乃其
最姚虞亦稱奇或以付託寄或以諫諍推餘子並奇偉
恩眷政在茲飄飄僊倅輩登瀛信如斯遂令千載下浩
然動遐思畫圖風采振史冊名譽垂念子久珍襲披玩
日愉怡持之索題詠苦乏瓊琚辭濡毫一揮洒允矣同
襟期

自牧齋

達人尚謙德德盛心愈卑崇高不自居驕矜竟奚為君
子安此道處之不復疑遵彼聖賢訓戰兢恒自持自卑
人益尊自晦道愈輝恪守以存位至樂良在茲嗟彼競
伐者邈與此相違

北征

鑾輿北巡狩垂拱敷至理拒車螳臂微烟塵起邊鄙皇
怒赫徂征天討詎容已六師素驍勇韜畧古莫比衛霍

皆偏裨揚威荷天子義聲自無敵直擣單于壘一掃朔
方平沙場淨如洗行將奏凱還龍旂復東指巍巍神聖
功特筆紀青史

題孔寺丞魯林懷思

孔林何鬱鬱聖遠道益尊洙泗衍遺澤苗裔今尚蕃迨
迨浙水東奕葉有賢孫松楸日在念霜露寒更繁披圖
重懷想水木求本源金石若在耳廟貌宛猶存羹牆寄
遐思誠義情所敦偉哉千載下簪紱耀華軒願言崇令

德永世期弗諼

薊門送別詩

有序

吾友張鳴玉由進士擢為行人幾十年銜命走四方皇
華之光榮映海內由是聲譽益振其為人寬和樂易不
事表襮與人交必以誠而操行彌謹又能恪恭所職未
嘗以勤勞介意今年夏以秩滿謁選吏部遂陞知江西
之贛州府予與鳴玉同里閭昔嘗同遊鄉校且與其授
業師楊君壽夫素所相知而交好篤密故於鳴玉之別

也既已欣然喜其超擢之榮而又不能不為之愴然于懷也遂託中書舍人陳宗淵作送別之圖且賦詩以寓意焉張君吾鄉彥夙有聲譽馳俊秀出庠序拜官當盛時皇華歷四方所至動光儀今晨忽告別出守西江湄五馬何輝煌皂蓋翼雙旗握手向都門臨岐薦芳卮丈夫志經濟早歲當有為章貢古名郡風俗亦清夷願揚天子恩撫字安黔黎桑麻蔽田野雞豚日蕃滋老幼自生息歲時樂雍熙勗哉古循吏龔黃以為期

螺山村人

我我金螺山下有田與廬日出雞犬喧蓐食事犁鋤白
髮不到城柴扉俯江墟隣翁時來往濁酒聊與娛賣卜
或開肆屢迴長者車一朝承薦剡忽捧五色書竭來往
都市門巷恒晏如淳朴本真性寧謂禮法疎緬彼螺山
側悵然懷故居願言崇令德允矣揚芳譽

樸齋為畫士郭文通題

鴻荒肇開闢民俗淳以熙太樸日云散風氣遂澆漓結

繩既已代巧偽紛日滋金罍鄙抔飲雕房易茅茨珠玉
交璀璨錦繡互彰施人心競浮靡古道何乖睽郭生獨
超邁質直由天資純然無表襮宵次良坦夷幽齋匪華
飾冲襟澹無為繪事益精到天機造神竒渾然辭刻畫
興至無不宜持此慕淳龐仰彼農與義永言慎始終素
履以為期

樂琴書處為沈學士題

君子有至樂乃寓琴與書外務絕紛擾方寸恒清虛簡

編日披閱宴坐窺唐虞潛玩弗自釋意適忘其劬悠然
千載心希彼賢聖徒有時鳴朱絃興至聊以娛泠泠太
古音迥與淞哇殊清風拂瑤軫明月照綺疏一彈曲未
終懷抱湛冰壺顧茲愜幽趣四體長安舒翛然一室間
此樂真有餘况茲荷寵恩出入承明廬風采動當世卓
犖誰能如退食得清暇徜徉遂幽居冲襟益瀟灑陶情
自怡愉永言崇令德庶以揚芳譽

題王侍講山水

木落霜氣清秋山淨如洗
天空萬籟寂地迫孤雲起
深溪湛寒綠對此清心耳
安得掃蒼苔橫琴寫流水

送弟仲宜歸鄉

吾宗出關西夙昔清白門
後裔日云盛派衍流益分
建安遂占籍瓜瓞綿以蕃
我祖懷隱德積善開慶源
我我大壩山佳木森雲屯
芳名重當世遺澤傳子孫
伯父抱才器聲價比璵璠
一官處中都戎幕稱賢賓
我父遠相從同氣情實敦
粲粲華萼輝噦噦鴻雁羣
清望屬明時

懿範垂後昆淪謝歲云久音容杳難聞嗟我承先緒遺
訓心所遵窮經忝科第志願幸已伸優游詞垣職出入
叨寵恩及茲二十載曷以摠忠勤譬彼海與岳安能效
涓塵終期竭駑鈍庶用答君親豈無桑梓懷迢迢隔晴
雲骨肉久乖違感慨難具陳吾弟忽遠至義重情乃真
提攜我仲子跋涉良苦辛相見若夢寐悲傷雜歡欣從
容問故舊婉婉及鄉園松榆幸無恙松菊今尚存顧此
萬里心罄茲終夕言連床聽夜雨秉燭對芳尊良晤能

幾何別意遽忍論秋風吹征衣灝氣拂高旻執手向都門
顧此停車輪殷勤在長道善保千金身悠悠離別恨託之
圖畫新烟樹既綿邈雲山復嶙峋時或一披覽慰此懷思頻

友恭堂為吳氏題

孝友出天性同氣古所敦自從降衷後此道今尚存東
浙有佳士夙昔重彞倫怡怡伯仲間玉季同金昆清芬
比華萼雅奏諧簾幄噦噦鴻雁行接武當晨暾和氣溢

華堂相歡對芳尊嗟哉閱牆者鄙薄寧足論願言保終始令譽垂乾坤

聽松軒

雅志尚林壑軒居絕塵囂喬松當前楹柯條入雲霄清風颯然至流響何瀟瀟初如振波濤倏若鏘鈞韶泠泠拂几席飄飄度山椒憑闌試靜聽迫覺形神超緬惟歲寒姿節操長後凋勗哉慎所持永矣懷高標

養拙齋為石彥誠作

世俗尚智巧惟拙衆所嗤
緬彼機警徒致用隨厥施
浮華競誇靡宛轉無不宜
巧言乃如簧聽者皆忘疲
紛紛若此流意氣高當時
卓哉徐聞令獨恥事環竒
守拙心自甘安分以養之
齋居揭華扁淳朴志不移
涖官思盡職寧計崇與卑
政化尚豈弟襟度亦坦夷
乃知一寸心上與古人期
勗茲崇令德允矣芳譽垂

題韓滉田家移居圖

唐家多宰輔卓犖韓太沖
煌煌六道間節鉞何其雄
平

生稱善畫筆法真能工值茲多難餘出鎮觀民風公退
展毫素天機發心胷偶為田家圖情態誰能同策蹇仍
跨牛前行忽匆匆蕭然村野姿有此媪與翁小兒亦何
知短髮如飛蓬移家向何處寧能辨西東想當風塵際
流竄無定踪惻然廊廟懷寓茲圖畫中方今聖明世四
海樂年豐黎庶皆按堵田里歡融融念此自興歎所貴
在遭逢鼓舞歌帝德萬古垂無窮

玉筍白雲為胡祭酒題

江南多勝地玉筍古名山扶輿孕靈秀疊嶂森層巒洞
天何沏寥羽駕不可攀琅玕相蔽虧芝草良足食君家
在其麓華屋依林間石田墾膏腴金川瀉潺湲緬昔風
塵際避亂去鄉關占籍豫章城東湖幽且閒惟君富文
學聲華播人寰諸生仰模範象笏聯清班兩京日遨遊
撫時覺衰顏先塋在故鄉迢迢隔雲端松揪覆泉臺霜
露淒以寒沈思不得往託此圖畫看摩挲發遐想日夕
增長歎頤茲純孝心展轉弗遑安攄辭迪後昆貽謀垂

不刊

松栢軒為陳御史題

松栢本孤直豈與凡木同深根蟠厚地危柯拂層穹後
凋知歲寒偃蹇冰雪中所以異羣植揀梁真足充高軒峙
華構手種由乃翁年深遂培養枝葉何籠蔥清陰覆窓
戶黛色蔽簾櫳遺芳及賢嗣慶澤遠益隆豸冠聳我
衣繡魚乘驄於焉仰餘蔭景德思無窮節操日以堅祿
秩日云豐五柳竟蕭索三槐委榛叢何如茲軒上青蓋

鬱童重願言慎封殖永世流清風

雅集圖

汴京富戚里王氏乃其賢雍容重文學瀟灑樂林泉名
園足勝概景物俱清妍嘉時愜幽賞休暇適所便一時
英俊流冠蓋來翩翩坡翁絕世資揮洒筆如掾偉哉丹
陽公據几方凝然主家兩名姬並立何嬋娟珠翠盛容
飾雲鬟下垂肩雙松高崔嵬上有凌霄纏石床清且潔
古器相駢聯玉卮發光潤瑤琴絙徽絃伊誰寫茲圖云

是李龍眠穎濱暨山谷傍觀志何專淮海自知音側耳
碧虛前飄飄米南宮洒翰飛雲烟王郎獨仰觀但覺蛟
龍騫亦有蒲團僧趺坐語空圓劉君諦聽之無乃好逃
禪陰森古檜茂晻靄芭蕉連清風洒脩竹芳氣出蘭荃
恠石倚幽壑泉聲落潺湲佳景已如此况復開賓筵諒
匪塵中人不異瀛洲仙良會雖一時英聲振八埏蘭亭
付陳迹蓮社徒荒阡奇哉西園集圖畫今流傳嗟我懷
昔人景仰心惓惓摩挲想風采歌詠聯詩篇斐然愧續

貂願以廁末編

送太子少保金公歸省

憶昔領鄉薦挾藝來京師濟濟文儒士煌煌金玉姿衆
中獨挺出傾蓋即相知叨陪大廷對日晏出彤闈清名
列虎榜令譽騰四陸聯鑣上林苑攀折瑤瑤枝天門既
蕩蕩雲路豈逶迤君居青瑣重子忝詞垣推含香立螭
陛簪筆趨龍墀胥為侍近地密邇清光垂內制須才賢
遷轉秩允宜館閣久同登旦暮恒追隨趨朝戴星入退

直乘月歸輔相乃宥密知者固云稀偉哉地清嚴需焉
恩渥滋先皇數巡幸寧復辭驅馳宮袍每同賜殿馬亦
偕騎付託何深重顧盼增光輝天驕和未靖鳴鏑臨邊
維赫然斯震怒撻伐蘇瘡痍相與扈清蹕直窮瀚海涯
獻替在惟惺草檄粲雲霓龍庭旆既返鼎湖龍亦飛悽
然抱弓劍匍匐還京畿至尊嗣寶歷恩澤遂旁施三孤
責既重八座任豈微宣公議常奏宗伯禮攸司不忘忠
國志還切倚門思聖朝崇孝理推恩誠匪私錫號太夫

人歸省當此時旭日明征騎春風吹綵衣朝列盡出餞
輿馬擁郊圻清歌白雪調綠酒黃金卮觀者誰不羨榮
華有如斯悠悠薊門道迢遞金川湄林深筍堪斲水暖
魚正肥稱觴祝遐壽拜舞慈顏怡伊我竟無似椿萱久
已摧因君念罔極茫然心獨悲臨分無以贈感歎伸此辭

退思齋為蹇少師題

人心妙虛靈不能以無思所思得其正酬酢隨所施惟
公出西蜀德望衆所推龍飛際景運位重今少師雍容

處廊廟輔治安黔黎退食有餘暇齋居思濟時秉心思
至公律已思自治進思罄忠言退思補闕遺庶政思佐
理庶績思咸熙賢才思簡拔禮義思維持治化思有成
舉措思得宜我皇正垂拱至德協無為惟公實啟沃四
海將倚毗生民永安逸鼓舞同邊陲願言慎所思令譽
千載垂

送沈學士民則還鄉省祭

聖代重儒術賢才悉登庸蒐羅極四海鶚剡橫高空雍

容居廟堂雜還趨九重吾友雲間彥湖海蟠心胃揮洒
出烟雲意氣吐晴虹一官列詞林名譽日以隆薦歷遂
升遷循序階顯融華萼既聯輝椿桂亦籠葱出入金馬
門日覲明光宮兩朝承寵渥雨露何其濃一朝奉絲綸
克展桑梓恭恩命既云下畫鷁乘輕風祖帳臨薊門芳
筵俎豆崇相勸須盡觴握手心忉忉豈無故舊懷停雲
在江東萼鱸鄉味佳蘋蘩孝祀同畫錦耀里閭賓友紛
相從嗟我久辭家閩山遠龍從因君獨惆悵縵縵情無

窮立馬黃金臺目送孤征鴻

送胡祭酒致政還鄉

昔在太宗時賢俊方彙征與君初識面遂結金石盟一
見得披豁聯袂登蓬瀛倬直居館閣顧問趨承明君獨
負才學胄監遂榮陞危坐擁皋比六館來諸生菁莪沐
時雨芹藻藹生成車駕臨辟雍裁冠講遺經寵眷自天
啟四海騰休聲優遊職史事驅馳歷兩京迨茲龍飛運
海宇躋昇平庶政已成熙恩澤九有盈百辟總歡抃盡

職攄衷誠驚詒重褒美存沒被光榮而君六袞年衰病
久相嬰聖情為悽惻賜歸豫章城璽書重嘉獎畫錦何
足矜祖帳出都門執手難為情西山鬱嵯峨南浦春濤
驚桑梓日在眼東風拂行旌嗟我今獨留念別心怊怊
矯首萬里天鴻飛正冥冥

薊門別意送程汝器赴饒州教授

秋高薊門路灝氣肅以清念子將遠別相送出都城祖
筵集冠蓋綠酒且頻傾臨歧欲分手繾綣難為情嗟我

子所契夙誼如弟兄麗澤藉資益硯席恒相并衣冠立
孔庭燈火親韓檠羨子先著鞭科目振英聲金馬待明
詔萬里皇華行我亦忝後塵翰苑蚤登名與子聯鵷班
出入在承明中道子暫蹶一旦復超升綉衣立霄漢驄
馬耀神京俄然返初服振袂謝恩榮閉門卧空山塵俗
澹無營及茲承薦剡簪紱喜重膺耄疾終懇辭職教任
匪輕西江盛文物師道貴老成子行方自重泮水日橫
經立雪長在門祖武真能繩他年想模範帳下蜚羣英

豈徒儒道崇宦蹟亦有榮而我慨離居執手思迴縈申
章道遠意矯首秋鴻征

上林春色圖

上林一何好芳樹何葳蕤繁花紛煜煜碧榦共低垂豈
無幽曠原亦有清漣漪脩竹獨含秀枝柯忽紛披羣鳥
恣游泳迴翔各適宜和鳴馴錦雉間闕語黃鸝王雎自
有匹鈎輻亦知時白鵬潔勝雪素鷺明頂絲鴛鴦有定
偶鸛鵲恒並棲物性亦各異於人竟奚為展圖一披玩

歎息生歔歔願爾衆禽類高舉毋自疑長隨雙鳳凰舜
廷共來儀

題邵憲使凝秀樓

草木有靈異三秀乃為芝至和資發育造化孕珍奇邵
君魁傑士家住浙水湄早登黃甲名聲譽即遠馳繡衣
動光彩白簡振霜威一朝掌外臺風裁善自持慈親既
云逝棄官遂東歸泣血屢欲絕哀慟無已時孝誠動天
地致祥亦其宜棲居何幽深礎石發光輝靈芝先後出

吐艷方歲。麤膚理益豐潤。金彩耀陸離。豈伊純孝忱。感
名良在茲。父老重嗟嘆。流傳世所知。勝事古未有。歌詠
宜聲詩。永言播清芬。令名千載垂。

送楊學士省親

春風三月時。花柳正明媚。偉哉玉堂仙。拜命辭丹陛。青
綾疏禁直。紫誥承恩意。歸舟一何輕。千里行已至。升堂
慰慈親。珠冠耀霞帔。稱觴介眉壽。綵服日嬉戲。眷言罄
深歡。祿養豐且備。顯揚方在茲。志願亦已遂。嗟予忝同

年夙昔托深契茲晨忽告別握手忍分袂相看念睽離
況乃篤交誼娛親雖云樂聖心懷輔治歸朝勿後期促
裝戒留滯新秋氣候涼紫陌需來騎

題唯心卷

人心妙虛靈本體自澄澈唯為私欲蔽善惡由此別所
以古賢達操存恒切切如苗去稂莠如稼去蟲賊一朝
復其初方寸遂昭晰伊人慕心學勇往企前哲兢兢戒
放逸孜孜務脩潔願言斯勉旃庶幾踵先烈

送少保黃先生還鄉

憶昔事太宗從容侍帷幄時時被顧問密邇居館閣維
公我最厚交契得所託丰標獨清竒襟度自恢廓獻納
効忠勤論思攄謬謬青綾每同直彩毫時間作出入二
十年親愛宛如昨龍輿忽上賓銜哀淚俱落仁皇嗣寶
位任舊多寵渥公時特承恩不日登峻擢三孤位隆重
兼秩祿非薄寧期望鼎湖弓劒隔冥冥今皇紹大統眷
遇恩禮數公乃久嬰疾懇辭返丘壑聖情念老臣錫賚

何輝霍歸帆指東浙養親以為樂榮名動宇宙英聲振
南朔到家懷遠音好寄雲間鶴

恒齋為順德王通判題

大運固不息歲運成四時惟人斯有常秉心貴不移所
志在弗易所存當善持允矣先聖言孜孜戒匪醫賢哉
三槐裔佐郡際明時齋居揭華扁賢哲以為規勉循自
毋怠矯激諒非宜惟能慎終始一節斯弗虧

悅琴軒為趙光英題

衆樂人所悅惟琴悅者稀古聲一何淡古調一何微華
哉此高軒几席涵清曦所悅獨在琴興至時一揮泠泠
朱絲絃粲粲黃金徽初彈別鶴操再彈威鳳儀悠然契
冲襟恬澹中自怡睠茲山水音雅趣疇能知

送陳旺司訓之毘陵

年少負才志力學勤書詩振鐸大江右聲譽已四馳竭
來始相見羨子美令儀皎然玉樹姿煜煜含清輝操觚
爲文章雅正且出奇復此拜恩寵鳴佩辭禁闈分教向

毘陵與我叙別離子行且慰意守職為儒師以道淑多
士勿謂官秩卑當今聖明主功高德巍巍崇儒重賢俊
致治昭雍熙勉旃益勵志敦默慎自持喻如荆山玉終
不爾棄遺申章以贈行莫訝相箴規

雲山圖為東里揚公作

雲山何宕蕘林木鬱而秀烟嵐絢晴光嵐際時層構繞
庭芳草深清禽哢春晝有書可覽適有田可耕耨展圖
念初服淹留嬰組綬因援嶧陽桐一寫丘中奏

送檢討陳嗣初還姑蘇

雨過晚色淨退直下西清涼颼起木末颼颼來秋聲故
人過我別明發有遠行撫景慕良覲睽離鬱中情握手
予不留尊酒聊為傾意厚未忍辭酒盡還獨醒長歌寫
衷曲為子叙平生憶昔未荆識林居養幽貞每於士論
中往往聞蜚英以茲用推轂奪爾鷗鷺盟尚希擅制作
庸以贊治平欣然解蘿薜遂赴求賢徵我章謁明主秉
筆登蓬瀛端操景先括遂學傳前經予亦得益友晨夕

資討評會晤益云密詎意疾所嬰浩然有歸志上疏思
遺榮漢庭多寵渥不能留長卿達士貴知止豈必功業
成守道苟不惑足以傳其名理棹向吳會驅車出都城
江雲引歸興朔雁隨行旌故園指日到親舊欣相迎于
于遂初願漠漠無外營金石宜善攝琴書益研精鄉黨
得師範後學式儀刑永矣保令聞當與前賢并

題梅贈御史張楷

雅韻不媚俗孤標絕塵姿皎如屑冰玉點在虬龍枝窮

冬寒氣盛草木無華滋寥寥溪谷間春意先自知霜雪
雖云厲清貞詎能欺所以古君子往往愛咏之廣平素
勁正亦吐幽婉辭愛物愛其德豈以顏色為念子栢臺
彥脩潔無瑕疵寫芳以相贈比德良在茲陋彼春陽花
嫵媚為世嗤勉哉樹高節歲晏以為期

題晚節秋香圖送羅閨副使之廣東

天挑饒春姿所媚在青陽舜華足朝玩日日無容光何如
東籬下粲粲寒菊芳圓華準天極正色侔坤裳繁露濯

秀葉涼颼振幽香孤特謝時態可與君子方昔人取自
況晚節終名揚寥寥北門什繼美維賢良羅君七閩彥
文采何煌煌柱下著清績志操凌秋霜進階貳臺憲持
節按炎荒臨別寫茲圖贈子意何長匪以資玩好我志
在激昂行哉懋晚節嫩譽當彌彰

題楊應春梅竹圖

玄冥閔重陰淒其北風涼江天正搖落草木同凋傷云
何梅爛開孤根獨回陽伶俜傲冰雪豈比桃李場亦有

碧琅玕秀色摩青蒼貞姿與勁節相對殊羣芳君子有
遠操儷美實所望畫圖供翫餘自覺幽興長緬懷西湖
詠載歌淇澳章

壽少傳西昌楊公

皇天開泰運帝德光羲軒匡翊賴臣佐乃生名世賢道
脈有所託文風由茲宣廬陵士淵藪歐陽啟其先昔人
雖已遠勲業今猶傳先生踵其武氣稟光嶽全文章與
德行當時罕與肩文皇安國本羽翼惟咨焉隨龍游少

海捧日昇虞淵鞠躬盡臣力所知無不言忠嘉納宸牘
惠利蘇民顛進階貳台輔領袖詞林仙保釐叅周畢纂
述追談遷大名垂宇宙茂績光後前位高心愈小任久
操彌堅優游綏福履濱茲古稀年歲運倏云往春陽聿
來還堯賞餘七葉壽星煥台躔左弧屬初度秩秩敷賓
筵盈門來賀客車馬何駢闐堂開塵外境酒醉壺中天
獻酌禮有加登降容無偏仁者固宜壽願比椿八千祝
頌匪予私衆心所同然長言播歌詠用繼崧高篇

送徐太守仲敬致仕

聖皇御寶曆圖治臻雍熙守令慎選舉務使安羣黎大
守姑熟來循良時所推方書龔黃政力以印綬辭自陳
七袞多志耄精神疲有母百餘歲康強尚未衰乞身遂
歸養庶得盡其私寵恩倏渙頒五馬不可羈長揖別交
友矧予為故知憶昔永樂中宮僚並命時一朝餞出守
會少多睽違茲焉謝事去把袂驚分攜黃鵠逝翩翩遙
望清江湄重結紫霞想不負青山期樂哉戲彩服眉壽

應同躋

文敏集卷二